



Rabu, 10 Januari 2024

Ogen: Miha 5:1-5a



ERSADA MULIHKEN



Renungenta wari enda e me sada nubuatan dingnen berita keriahen man kalak Betlehem. I je me reh sekalak raja si ipekeke Dibata i bas kutana nari. Bage me lagu ende-enden 'Kuta Betlehem aminna kitik kam, labo medungu kam, ermulia me kam...' Kuta kitik, megati la tama kiran man sienterem, menukah ilupaken. Bagi Jesus, si asalNa i kuta Nasaret, lit kalak si mapas alu nungkun, lit kin si mehuli si banci reh i nasaret nari?

I bas Betlehem e nari me ipadanken Dibata 'si mpersadaken' bangsa e. Iandingken maka anak diberu si mupus e me senina-seninana i bas pembuangan seh maka ersada mulihkan. Reh me IA guna ngerajai bangsa e alu gegeh si reh arah TUHAN nari. 'Si mpersadaken' e me Raja, la terjeng ngerajai rayatna tapi tujunNa maba kerina si irajaiNa gelah nggeluh alu senang. Kesenangen situhu-tuhu. Sabab IA reh maba dame. Perdamen siipadanken DIbata e me si mpersada ia kerina, subuk si ipembuangan ras sitading denga. Arapen e me si ipeturah i bas kegeluhen bangsa enda.

Labo ise kam dingnen i ja nari. Kai pendahinndu ras kuga bayakna kam. Sipenting ukur si ersuruh guna kiniersadan i bas kerina persadannta. I bas jabu, moria, perpulungen, kita idilo gelah nggit ersada, ngelupaken erbage-bage perbeben, perubaten, la siangkan i bas tahun-tahun si lepas. Alu natap ku lebe, ku masa depan si tuhu-tuhu dem alu kesenangan. E me siipadanken Dibata man banta i bas tahun 2024 enda. Tahun kesangapen dingnen dem pengarapen. Sidalani tahun enda alu semangat. Ula ernde-nde. Pekena si ceda, persada si pecah, perdameken si rubati. E maka malem ateta nggeluh i bas paksa-paksa si ibereken Dibata. Padan e enggo sialoken i bas natal si enggo silakoken kita.

➤ Ersadalah guna ndalanken si mehuli si ipedahken Dibata